



明世法錄 八十二




		二	漢書門
	九	二	
五	三	八	
冊	架	函	號類

庫文閣內			
元	二		漢
五	五	二	
函	九	二	
一	五	八	書
六			
架	冊	號	類

內閣文庫			
番號	漢	2228	
冊數	59 (51)		
函號	295	56	





皇明世法錄卷之八十二

淺草文庫

史官 陳仁錫 輯次




南蠻

論曰。海上諸國。占城暹羅為大。

明興。竝受職貢。而占城助征安南。暹羅協攻緬。悉索散賦。以從王師。無忝外臣矣。淳泥蘇祿。其王入覲。闕庭。竟以身殞。而

天朝。龍以葬謚。至今奉祀不絕。有以夫。四夷慕義。梯航踵接也。自佛郎機紅夷薦食外洋。而滿刺加呂

宋。竝無易社。鯨波時沸。牛耳狎主。而賈舶往來。直



趨歿地如鶩。且勾引內訌。罔惜啓疆。小人羶利。亦何異藏珠而剖腹者哉。余讀東西洋考。至機易金豆彭湖尋盟。爲低回太息。

占城

占城古越裳國。在交趾南。周成王時重譯獻白雉。秦爲象郡地。漢併南越。置象林縣。屬日南郡。東漢時數寇掠。其後縣功曹子區連殺令。自王號林邑國。傳數世。甥范熊代。子逸。晉武帝太康中來貢。日南人范椎有奴名文。嘗牧牛。獲二鯉。澗中。化爲鐵。以鑄刀。削石立解。因爲逸將。教作宮室械器。乘逸

死篡立。永和。中。攻陷日南。九真。義熙。後。頻入寇。交州爲弱。五世孫見殺于扶南王。大臣范諸農平其亂。自立。宋永初二年。以諸農子陽邁爲林邑王。陽邁者。華言紫磨金也。林邑有金山。石皆赤金。夜飛如螢。鑄金人大輒十圍。天嘉中。交州刺史檀和之將兵深入。銷金人。得黃金數十萬斤。齊天監九年。其王范文凱獻白猴。歷梁陳。貢獻不廢。隋仁壽末。遣將軍劉芳。率步騎萬餘往擊。其王范梵志引衆乘象逆戰。芳掘坑覆艸。僞北。誘陷之。入其都。獲廟主十八枚。皆范金爲像。蓋有國凡十八葉矣。因以

其地爲三郡。置守令。道阻不克入。梵志尋復國。唐貞觀時。王頭黎獻五色鸚鵡。子鎮龍被弑。范姓遂絕。國人立頭黎女爲王。不能定。迎立頭黎姑子諸葛地。至德後更號環王。王所居曰占城。後因以占城爲號。史稱其俗累磚爲城。塗以蛋灰。王着法服。加瓔珞如佛飾。出則乘象。吹螺擊鼓。幡旗。用吉貝。鎧以藤。弓矢以竹。國不設刑法。有罪令象踐殺之。人深目昂鼻。髮拳色黑。貴女賤男。嫁娶用八月。右姓曰波羅門。物產大抵同交趾。周顯德中。占城貢方物。有通犀帶。作雲龍形。及薔薇水。猛火油。宋建

隆二年。其王釋利因陁盤遣使來朝。書表于貝多葉。盛以香木函。爾後貢獻相望。太平興國六年。交州黎桓獻占城俘。太宗令廣州撫遣之。雍熙後苦交州侵逼。其民率附儋廣二州。淳化三年。賜其王白馬二。遂爲額。大中祥符四年。貢獅子二。畜苑中。皇祐七年。廣西安撫經略司言。占城近脩武備。僉交趾。將繇廣東路入貢。熙寧中。詔協力致討。其國選兵七千。梃賊衝。以木葉書回牒。訖無成功。後兩國並入貢。使請各避政和中。授其王楊卜麻疊金紫光祿大夫。領廉白州刺史。予奉給。宣和元年。進

簡較司空兼御史大夫懷遠軍節度封占城國王自是每遇恩降制加封邑淳熙四年占城以舟師襲真臘傳國都慶元後真臘大舉復讐俘其王占城地悉歸真臘更立真臘人主之因號真臘元至元中內附降虎符封占城郡王命左丞唆都等立省尋以負固命行省官率兵自廣州航海縱擊佯請款獻金葉九節標槍其王栖鴉侯山立砦聚衆二萬餘且借兵交趾真臘諸國截歸路師回招諭始奉表降

國朝洪武二年命行人吳用顏宗魯楊載等齎

璽書使占城爪哇日本等國會占城國王阿答阿者遣虎都蠻來朝貢虎象優詔答之其年貢使蒲旦麻都言安南逼境諭兩罷兵遣中書省管勾甘桓會同館副使路景賢封阿答阿者爲占城國王賜鍍金銀印大統曆金綺三年遣祀山川以占城通中國文字令貢士赴

京師時安南高麗沙漠平頒詔其國四年阿答阿者遣答班瓜卜農奉金葉表來朝譯稱安南侵擾願賜兵器樂人俾知聲教所被少紓凌奪

上意憐之命中書省咨王言占城安南並奉正朔已

諭令安南罷兵。更給爾兵器。是同佐鬪。所請聲樂。華夷方言各異。如爾國能習華音。聽赴京肄習。并論福建行省。免征占城海舶。示懷柔意。八年。諭占城等國。三年一朝貢。以貢使挈行商多詐。著祖訓沮遏之。十六年。遣子來賀。

聖節。給勘合文冊。二十四年。以其臣閣勝弒立絕貢使。永樂元年。其王占巴的賴遣賀卽位。愬安南侵掠。諭息兵修好。四年。征安南。勅廣東都指揮使繇海道往占城會兵。五年。獻黎民俘表謝。七年。命中使鄭和等往賜其國。自五虎開洋。張十二帆。順風

十晝夜至。其酋戴三山金花冠。臂腕束以金鐏。乘象馬郊迎。蒲伏。十一年。再征安南。兵部尚書陳洽言。初計黎賊及陳季擴。占城王出兵觀望。至化州大掠。以金帛戰象資季擴。季擴亦遣以黎蒼女約。侵升華府。厥罪惟均。

上以交趾初定。不欲窮兵。諭歸侵地。十六年。貢瑞象。自永樂後。三年一貢。其國嗣王輒請命。宣德元年。行人黃原昌往頒正朔。繩其王不恪。卻所贈金帛。擢戶部員外郎。七年。暹羅使者以前使及番伴百餘。爲占城拘留。愬于朝。正統元年。占城使至。詔還

皇明廿二金 卷八十二 五
所留暹羅人。及我軍往西洋未歸者六年。行人吳
惠齋勅立其嗣王摩訶貴。舟發東莞。從交趾界抵
國。時臘月尚暑。國人多裸袒。稻始熟。明年上元夜
王羨沉檀燃火樹。盛陳樂舞款客。十二年。攻安南
爲其王黎灝所敗。景泰末。摩訶貴卒。其子槃羅茶
全請封。天順中。命給事中江彤。行人劉寅之。

賜冊。五年。安南王灝大發兵破占城。成化七年。槃羅
茶全卒。弟槃羅茶悅攝國事。奏安南攻圍劫賜印。
以息兵諭安南。九年。命給事中陳峻等。賫印封槃
羅茶悅爲王。抵靈山。聞茶悅等被虜。乃還。而安南

王灝奏占城前襲其化州。槃羅茶全親率象馬。令
弟槃羅茶遂先發。反弒茶全。而槃羅茶悅子茶質
苔來率徭峒。伏竹弩。夜攻殺茶遂自立。邊吏黎文
因發兵擊盜。頃已奉勅還所掠。兵部尚書項忠等
以奏詞牴牾。請勅其實奏。十四年。安南王灝遣陪
臣阮達濟奏辯占城非沃壤。曾無占奪。望遣朝使
申畫郊圻。二十年。占城復請封。命給事中馮義。行
人張瑾。賫勅印往。義等方乘巨舶。市利至廣東。聞
所請封爲王者死。恐空反。遂馳至占城。而安南已
用僞勅。立國人提婁苔居攝。即以印幣授提婁苔。

冊爲王。得厚賂黃金。還經滿刺加國。貨所賚至海上。義死。瑾歸報。而王弟古來先奏請嗣封。前事頗泄。瑾下詔獄。坐專擅論斬。謫戍邊。明年復遣給事中李孟陽。行人葉應。封古來爲王。按古來奏。初王見虜。王弟槃羅茶悅潛匿。比封使至。復爲交人所執。後憇天朝。訪本國子孫撥還故土。自邦都郎至占臘地界五處。立齊亞麻勿庵爲王。無何。次弟古來序當立。願遣使諭還全境。二十七處。四府一州二十二縣。東至海。南至占臘。西至黎人山。北至阿木喇補。凡三千五百餘里。而提婁苔譯占城使不

知何許人也。爲安南所納。抗言古來不當嗣。二十三年。古來自老撾走崖州。憇羅時孟陽等次廣州。疏言占城僻險。安南構兵未靖。恐驟封至損國威。宜勅安南悔過。仍令古來歸國聽勸。從之。命兩廣督府主其事。都御史屠瀟屬叅議姜英勘寔。僉謂古來王弟宜繼。

賜勅切責安南王灝。始聽命。瀟製海舟。募勇士千人。護古來至新州港。弘治元年。王古來奉金葉表謝。并附至黃白金器飾於瀟。

上諭瀟受固辭。十八年。古來卒。其子沙古卜刺請封。

給事中任良弼等疏行勘明。遣使賫勅。至廣東境。上令領歸國報可。正德五年。仍命給事中李貫。行人劉廷瑞授冊。而貫憚往。以無通事諸人爲解。致命于其使而歸。嘉靖初。占城及暹羅等國。商泊廣東市舶中。使牛勞私貿易事覺。沒其貲。頃之。沙古卜刺卒。沙日底齊立。二十二年。遣叔沙不登古魯等。奉金葉表貢方物。以綵幣報。

賜其王使者請給冠帶。及稱安南攻掠。乞護出境。並報可。其國東北瀕海。從福建長樂五虎門西南放舟甚駛。距海口百里。立石塔爲標。舟皆繫焉。然貢

道繇廣東。按元史。其國近瓊州。舟行順風。可一日。至治木城。可二十餘里。俗便山習水。開北戶向日。鮮霜雪。尚釋。無絲罽。衣禁玄黃。以白氎布纏胸垂至足。窄袖椎結。居茅茨。不踰三尺。分晝夜各五時刻。無閏月。夜鼓八更。睡起以子午爲率。見月飲酒。歌舞爲樂。元旦驅象出郭。名逐邪。冬至定十一月望日。釀酒俟熟。賓主繞甕坐。且啞且注水。味盡乃止。產諸香。饒象牙犀角伽楠香。惟此地有之。價亦頗貴。犀如水牛大者八百斤。角在鼻端。長可尺五寸。馬小於驢。樹之異。有觀音竹如藤。長丈八尺許。

色黑如鐵。每節長二三寸。稻種耐旱而早熟。宋真宗時。求種給江淮兩浙。擇田高者藝之。即今黃秬。所謂占城稻也。語燕鳩。果于戰鬪。或云文書用羊皮及黑木皮。土襪白沙。畜多牛。不任耕耨。亦鮮粒食。醞以生蛆為佳。歲時酋長採生人膽入酒。又以浴身曰通身是膽。王當賀日。沐人膽汁。出游乘象。或黃犢車。一人持檳榔盤為導。尸頭蠻本婦人。目無瞳。與家人同寢。夜深頭飛去。食人穢。飛回復合。體如舊。諸有罪送不勞山。始弘治中。安南數侵占。城奏請命官往諭。大學士李東陽獨曰。王者不治

夷狄。安南雖修貢。然負固日久。今遣官抵其國。海島茫茫。空掉寸舌。萬一執迷。衡命寢置。不問損威已多。即問罪興師。開禍尤烈。宜勿聽。時以東陽得大體云。

真臘

真臘本扶南屬國。在占城西南。其王質多斯那兼扶南有之。姓刹利氏。隋大業十三年。貢獻始通中國。唐貞觀初。傳子伊奢那與環王相攻。自武德至聖曆。凡四來朝。神龍後分為二。南際海。饒陂澤。號水真臘。北多山阜。號陸真臘。其後復合為一。宋政

和六年遣使貢賜以朝服。宣和二年封為真臘國王。建炎二年以郊恩授其王金哀賓深簡較司徒。如食邑所部聚落六十餘。有銅臺列銅塔二十四。銅象八鎮其上。象各重四千斤。歲時朝會列玉猿孔雀犀象各曰百塔州。以金盤椀盛食。因有富貴真臘之諺。其國戰象幾二十萬。馬多而小。閩人有浮海之吉陽軍者。風泊占城。方與真臘各乘象戰。教占城習騎射勝之。慶元中真臘破占城。更其王占城轉屬焉。元遣使招諭真臘臣服。其習尚詳隋書。及永嘉周達觀所作風土記。自溫州開洋經交

史王氣象
作甚

趾抵占城。又自占城可半月。抵真蒲。即其境地廣七千里。北抵占城。西南距暹羅。各半月程。南距番禺。十日程。東瀕大海。國中有金塔及銅石塔。城上石佛頭五。中飾以金。王三日一聽朝。坐七寶牀。出入擁劔立象上。迎小金塔金佛前導。非嫡子不嗣。自王以下。男女皆椎髻袒裼。止以布圍腰。手足並帶金鐲。以香藥塗體。皆奉佛。僧茹魚肉。唯不飲酒。供佛亦以魚肉。疊貝葉為經。甚華整。每旦澡洗。以楊枝淨齒。誦經呪文。書以麂鹿皮。染黑蘸粉畫字。亦有通天文者。能推算日月薄蝕。以十月為歲首。

閏悉用九月。夜分四更。候燠不識霜雪。夏秋冬雨。移避山居。產翠羽。諸香。佳樹異魚。貿易以婦人。貴中國針梳鍋蓆磁漆等器。開戶東向。坐以東爲上手。以右爲淨。其大較也。俗稱儒爲班詰。僧爲苧姑。道爲八思。班詰不知所誦何書。但從此入仕爲清貫。彌望沃野。不事蠶織。後暹人來居。得桑與蠶種。縫補織紉。率倩暹婦爲之。洪武初。其國王忽兒那遣奈亦吉郎表賀獻方物。六年。

賜大統曆文綺。二十年。命行人唐敬使其國。貢象五十九。永樂初。以卽位諭海外諸蕃。御史尹綬使真臘。自廣州發船繇海道。歷占城。經淡水湖。菩提薩州。繪山川爲圖以獻。三年。其王參烈漚毘牙卒。

命序班王孜往致祭。給事中畢進賫詔。封其子嗣王景泰二年來貢。

賜王及妃文綺。後朝貢不絕。今真臘訛爲東埔寨。賈舶止抵海隅。篤木州。以柴爲城。華人率寓居。市道甚平。或云卽蒲甘國。

暹羅

暹羅國在南海中。自東筦放洋。歷占城西南行。順風七晝夜至。其北岸連交趾。本暹與羅斛二國。暹

土瘠不宜耕稼。羅斛平衍多獲。暹仰給焉。或曰暹即古赤土。羅斛即古婁羅刹。赤土亦扶南別種也。隋大業三年。遣屯田主事常駿等使赤土。自南海郡舟行二旬。達鷄籠島。至其界。王姓瞿曇氏。禮遇甚厚。隨貢方物。獻金芙蓉冠。龍腦香。鑄金為多羅葉文表。封以金函。後改名暹。元成宗元貞初。暹國進金字表來貢。至正間。暹降羅斛為一國。洪武初。遣大理少卿聞良輔往諭之。四年。其王參烈。昭毘牙遣使奉金葉表朝貢。賀正旦。大統曆六年。其子參烈寶毘牙復遣貢。併獻其國

地圖。十年。貢象及方物。命禮部員外郎王恒等賫詔。

賜以暹羅國王之印。十六年。給勘合文冊。令朝貢以時。二十八年。遣中使

賜嗣王昭祿羣鷹及妃文綺。永樂元年。奉表乞量衡為國中式。并賜金綺。古今列女傳。爾後定三年一朝貢。貢道繇廣東。二年。福建布政司奏有番船泊岸。係暹羅國與琉球通好。已藉船物請命。

上謂禮部尚書李至剛等曰。諸番脩好。乃美事。漂舟所宜加恤。令所司為治舟廩而遣之。七年。奉表遣

祭

仁孝皇后使還諭歸南海流民何八觀等十三年嗣
王侵滿刺加國勅令罷兵二十一年定例免抽貨
稅給賞畢日許于會同館開市宣德中賜予稍減
成化十三年使來貢汀州士人謝文彬以販鹽下
海漂暹羅仕至坤岳坤岳者華言學士至是偕來
貿易蕃貨事覺下吏弘治中命給事中林恒往冊
封正德十年進金葉表文貢方物譯其字無識者
大學士梁儲疏請選留來夷一二名在館肄習從
之嘉靖元年暹羅及占城各番舶至廣東市舶中

使牛榮縱僕私貿蘇木胡椒諸物鬻南京盤獲伏
法三十二年貢白象及方物象斃于途遺牙一枝
使者飾以珠寶置金盤并象尾獻

上嘉其意禮遣之三十七年其王勃畧坤息利尤池
牙遣使賫金葉表來朝明年從貢使請特還抽稅
佐脩舡費隆慶初東蠻牛求婚暹羅不許統沙外
兵破其國虜世子及賜印歸萬曆初嗣王擊走東
蠻牛是後暹羅益強移攻真臘真臘請降七年復
遣使具金葉表文來貢二十二年緬酋雍罕等從
蠻莫遁歸暹羅卷甲趨之俘斬數萬緬勢遂衰其

國方千餘里。山迴環峭立。後嵐熱。王宮壯麗。覆以錫瓦。民多樓居。避溼。樓密聯檳榔片。繫以藤甚固。俗勁悍。削檳榔木為鏢鎗。水牛皮為牌。并藥鏃。習水戰。大將多用聖鍊。裹身。刀矢不能入。聖鍊者。人腦骨也。王跨象。或乘肩輿。白布纏首。腰束錦悅。以受封。

天朝獨留髮。國中婦多智。夫聽于妻。遇中國男子輒私之。以諸香澤其體髮。日夕三四浴。男陽嵌珠玉。富者範金盛珠。行有聲。婚則取女紅貼男額。沃土力穡。尚釋教。經字皆橫書。家及百金。即以其半施。

佛重喪禮。貴人以水銀灌屍。墓高阜地。民間或筏浮於海。迎僧呪。大鳥食之。頃刻盡。謂之鳥墓。釀秫為酒。甲諸夷。稱暹酒。工刺繡織絛。市用海貳。言語大類廣東。貢物犀。象。珊瑚。寶石。阿魏。諸香。六足龜。西洋布之屬。其旁國六坤。風土相似。多產椒。

瓜哇

瓜哇古闍婁國。在南海中。一名蒲家龍。今稱下港。每移文書千三百七十六年。疑肇啓漢初云。宋元嘉十二年。國王師黎婁達阿陀羅跋摩。嘗遣使奉表。唐曰訶陵。南瀕海。北真臘。王居闍婁城。貞觀中。

皇明世宗 卷八十二
入貢。至上元間。推女子爲王。號悉莫。令寔嚴肅。大曆中。訶陵使者三至。元和八年。獻頰伽島。朝貢訖。咸通宋。仍號闍婁。其國與三佛齊國數構仇殺。淳化三年。國王穆羅茶遣使朝貢。大觀三年。再入貢。禮之如交趾。元號瓜哇。舟行自泉南經占城。至其國程可一月。或曰自東莞開洋。至占城。順風二十晝夜。至世祖海外之役。瓜哇爲大。至元二十九年。詔平章史弼等。率福建江西湖廣三行省兵二萬。征瓜哇。從八節澗。水陸並進。會瓜哇與鄰國葛郎構兵。其王爲所殺。婿土罕必闍耶奉地圖降。請援。

遂攻葛郎下之。因詐歸治裝。入朝。反。遮擊還軍。弼斷後。得舟達泉州。洪武二年。遣行人

賜以璽書。五年。其王昔里八達刺。遣使奉金葉表。貢方物。納元授勅。九年。其王八達那巴那務貢白鹿孔雀。尋以中朝待所屬三佛齊與之埒。使臣取道邀殺之。十三年。奉金葉表。貢黑奴三百人。

詔切責。絕其貢。三十年。以三佛齊挾詐阻商。令禮部移暹羅轉諭。後其國分東西二王。永樂二年。東王孛令達哈遣使朝貢。請印。以鍍金銀印

賜焉。五年。西王都馬板滅東王。會朝使舟過東王城。

死者百七十人。降勅詰問。西王懼。上表謝罪。願償黃金六萬兩。已貢萬金。

上曰。朕令遠人知畏耳。寧利金耶。罷弗徵。

賜鈔幣諭之。十一年。貢使還。勅聞王以割舊港地界。與滿刺加懷疑懼。浮言。慎勿聽。十三年。西王更名。楊惟西沙。遣使謝。十六年。獻白鸚鵡。宣德後久不至。正統三年。復來貢。使臣亞烈馬用良。八諦南巫。先後乞賜金銀帶予之。亞烈八諦。皆官名。用良與通事良殷。南文。且竝漳州人。殷乞還鄉。用良文且乞便道過里。仍還國。皆報可。命有司給道里費時。

真臘等十一國使臣歸。勅瓜哇護其行。八年。以廣東參政張琰言。朝貢靡敝中國。令以三年爲期。景泰三年。求傘蓋及蟒衣。

詔給其一國王爲巴刺武。是後朝貢無常。其國四鄉。初至杜板。僅千家。主以二酋流寓。多廣東漳泉人。有水一泓。甚甘。稱聖水。相傳元將史弼高興。徃征。經川乏水。祝天。泉隨湧。東行半日。至廝邨。中國人留客成聚。名新村。約千餘家。編茭樟葉覆屋。村主廣東人。番舶至此互市。琛寶克溢。又南水行可半日。至淡水港。乘小艇行二十餘里。至蘇魯馬益。米

糧所湊亦僅千餘家。半中國人。港旁大洲。林木茂蔚。有長尾獠數萬。又水行八十里。至漳佑登岸。西南陸行半日。抵王居。磚墉高踰三丈。方三十餘里。宮宇鋪板。蒙以藤花蓆。頗宏麗。其俗有名無姓。尚氣好鬪。生子一歲。便以七首佩之。蓬頭跣足。上衣下帨。初婚。以五日後迎新婦。裸而跣。被金珠綵飾。王頂金葉冠。腰束錦綺。跣坐。或跨象乘牛。市用中國古錢。衡量以倍。華船上澗貿易。晨集午罷。王日徵其稅。澗東紅毛番。澗西佛郎機。各起土庫。歲以哈板船往來。用銀錢互市。本夷則用鉛錢。書同

項里無楮筆。以刀刻葉上。西番賈胡及唐人襍居。服食多雅潔。土人啖蛇蟻。虫蚓無七筋。至與犬同寢食。信鬼好游。或乘軟兜。寇盜少。不設刑禁。輕者金贖。重卽以藤繫。亦殺之。莖以水火。或令犬食。曰犬莖。樂有橫笛鼓板。自爲夷舞。銅鼓響欲遏雲。價值可數十金。貢物鶴頂火雞犀象珍珠諸名香藥。及西洋鍍鶴頂鳥腦骨厚寸餘。外黃內赤。火雞軟紅冠。銳嘴食炭。大於鶴。產倒掛鳥。形如雀。羽五色。每焚異香。取貯翼間。夕則張尾翼倒掛以散焉。亦饒吉貝。枕椰木。青鹽。綵鳩。白鹿。白猿。猴。所屬蘇吉

異鳥可入
齊諧

丹丁機宜打板打網底勿諸國其旁國磔里日羅夏治合猫里。

蘇吉丹

蘇吉丹今訛為思吉港閩粵支國直泉州丙巳方東至海水勢漸低女人國在焉逾東則尾間所泄非人世矣王五色布纏首跣足出蔽以傘從者五百餘各持鎗劍頭戴帽如虎鹿牛象狀不一剪髮裸體以布裹腰波羅密果甘美蔗長踰丈或曰思吉港聚落頗眾而吉力石其主也國在山中賈舶僅經其水瀆華人泊饒洞貿易饒洞曠衍以石為

城酋出入乘車御馬亦御黃犢鹵薄皆備風俗大類下港饒洞之後為金後山饒有修竹茉莉土人以一紙蔽下體種荳供食或射鹿佐酒

丁機宜

丁機宜幅員最狹酋眾僅千餘其國以木為城王居列鐘鼓樓出入騎象以十月為歲首性好潔俗近瓜哇而酒禁甚嚴上族輒不御酒客至以扶留藤檳榔代茗惟細民無賴時時闌入醉鄉曹偶共笑之地接柔佛為所浸姑通姻好與華人舟中互市產犀象黃蠟嘉

吉里地悶

吉里地悶其國在重迦羅東與瓜哇接今訛為遲悶重迦羅山最稱奇秀沿山皆旃檀至伐為薪氣蒸人候苦熱午必俛首向水坐差可辟瘴然易染疾灰田肥宜穀無它產男女斷髮寄短衫夜臥不覆體商舶所聚去城稍遠每舶至王必出臨之侍衛頗盛日輸稅亦不苛索也俗以立為尊夷人見王則坐地合掌不知年歲亦無姓氏文字以石片紀事如干石則總于繩為一結訟則兩造各牽羊曲者沒之蓋猶有結繩束矢之風焉

夷風近古

碟里

碟里國在東南海中大洲上有諸港通海人淳產薄尚佛少訟永樂三年國王遣使馬黑木來朝貢

日羅夏治

日羅夏治海中小國無他產產蘇木胡椒頗知種藝奉佛寡盜永樂三年國王遣使朝貢

合猫里

合猫里國即猫里務地小土積多山山外大海饒魚蟲人亦知耕稼永樂三年同瓜哇國朝貢產胡椒蘇烏木地隣呂宋漸成沃土俗亦近馴舶人語

曰。若要富。須往猫里務。蓋亦小邦之善區也。有網
巾礁老者。蕩舟為盜。海上往來甚駛。其國重遭寇
掠。遂轉貧困。賈舶多指別島。

三佛齊

三佛齊國。在東南海中。即舊港。又名淳淋。本南蠻
別種。有地十五州。東距瓜哇。西距滿刺加。南距大
山。西北濱海。自瓜哇南向。順風八晝夜至。或云與
占城隣。居真臘閩漚間。汎海二十日。至廣州。俗饒
而囂。水多地少。部領得陸居。餘架筏水中。為梁柱。
蓋屋。水長則筏浮。便遷徙。土沃倍它壤。語稱一年。

種穀。三年生。金言富。米穀多。貿金也。番舶輻輳。率
漳泉東粵人。以錢布市。用梵書。眎王指環為印。亦
有中國文字。累甃為城。周數十里。覆屋以柳葉。不
輸租賦。有征伐。則調發。習水戰。敢死。海上竝畏之。
其國人多蒲姓。唐天佑元年。來貢。授其使蒲訶栗
立寧遠將軍。宋建隆後數朝貢。大中祥符元年。許
貢。使赴泰山。陪位于朝覲壇。天禧中。奉金字表。貢
真珠象牙。梵夾。經崑崙奴。元豐五年。貢使入見。以
金蓮花貯真珠龍腦。撒殿。紹興中。張運為度支郎
中。嘗請將戶部所儲三佛齊國貢乳香九萬餘斤。



直可百二十餘萬緡。分鬻江浙荆湖漕司克餉。洪武初遣行人趙述使其國。其王怛麻沙那阿稱臣。四年奉金字表貢方物。賜大統曆文綺。六年來賀正旦。八年遣使往招諭拂菻國。九年怛麻沙那阿卒。王者麻那者巫里請封。十年詔賜三佛齊國王印駝紐鍍金。其國初隸瓜哇。後爲所并。國廢於舊港。置小酋市易。南海商梁道明聚居。積歲遂糾衆爲之長。永樂二年命行人譚勝招還。而陳祖義以廣東人亡命爲將領。橫掠行旅五年。

中使鄭和充舶下西洋。祖義鄉人施進卿愬和擒殺之。承制官進卿留長舊港。是年遣塔丘彥誠入貢。詔設舊港宣慰使司。以進卿爲宣慰使。二十一年。于濟孫襲。修貢。同諸番產神鹿。猫睛石。膾膈。鱗魚。薔薇水。龍腦。諸香。神鹿如巨豕。高三尺。膾膈魚類。豕首兩足。其膈紅紫色。上有紫斑。置睡犬旁。驚跳若狂。貢物有火鷄。五色鸚鵡。黑熊。白獺。龜筒。苾布。毘羅綿。被道廣東。或云三佛齊。王號詹卑。今王所部稱詹卑國。而故都爲瓜哇所破。更名舊港。以別於新村。詹卑市價償金以椒。喜買夷婦。他國多

載女子。易椒以歸。

百花

百花國。居海中。依山為國。天氣恒燠如春。無霜雪。多嘉樹奇卉。四時蔥鬱。故名。俗富饒。尚釋教。或云。即宋史注輦國。本役屬三佛齊。洪武十一年。其王刺丁刺者望沙。遣使奉金葉表。朝貢。貢物有白鹿。紅猴。龜筒。玳瑁。孔雀。倒掛鳥。今附舶香山濠鏡灣貿易。

文郎馬神

文郎馬神國。近山。以木為城。居民築室。大類三佛

齊。五色布纏首。腹背多裸。或着衣小袖。蒙頭而入。下體以縵圍之。初以焦葉盛食。及通中國。漸用磁器。好市華人磁甕。畫龍其外。人死貯甕以葬。王出乘象。或泛舟。以繡女從。典衣持劍。或捧檳榔盤。威儀甚都。華人與夷女通。輒削其髮。以女妻之。不聽歸也。女蓄髮苦短。見華人髮長羨之。或詒曰。我長中華。用華水沐耳。夷女競市舟中水。華人故靳以資嘲笑。間携香蕉茉莉相贈。土產鶴頂荇藤。最多入山深處有村。名烏籠里。其人盡生尾。逢人羞澁。掩面欲避。然地饒沙金。夷人携貨往市。擊小銅

皇明世法錄 卷八十二
鼓爲號。貨列地上。卻立山中。人前視貨。當意者置金貨側持去。按水經注其國一稱文狼。或曰馬文淵。遺兵流寓號馬流者。茲殆其苗裔云。

淳泥

淳泥本閩粵屬國。在西南大海中。統十四州。前代不通中國。宋太平興國二年。其王向打始。因商人蒲盧歇附使表貢龍腦象牙玳瑁殼。元豐五年。其王錫理麻喏復遣使貢。乞從泉州乘海舶歸。本朝洪武三年。命御史張敬之。福建行省都司沈秩持詔往諭。其王馬合謨沙頗倨傲。秩正言折之。

乃竦聽。以蘇祿來侵爲解。秩反覆曉譬。遣使隨秩等至。以金表銀箋貢方物。八年。

詔淳泥山川之神。附祭于福建山川位次。永樂三年。命封麻那惹加那乃爲淳泥國王。

賜印符誥幣。六年。王率其妃及子來朝。泊福州港。守臣以聞。遣中使往勞。所過郡竝設宴。抵京。王奉金字表獻珍物。妃箋獻

中宮 東宮。

上宴王奉天門。命供張會同館日給牲牢上尊。

賜金玉帶繡龍襲衣鞍馬。是年。王卒于館。輟朝三日。

皇明世宗 卷八十三
祭賻甚厚。葬南京城外石子岡。樹碑立祠。以西南夷隸籍中國者守之。謚恭順。所司以春秋祀。封其中子遐。狂嗣。遣使送歸國。故事歲輸瓜哇片腦四十斤。上勅瓜哇罷征。兼封其國山爲長寧鎮國之山。製文刻石。從所請也。十二年及洪熙元年。皆來朝貢。命廣東布政司宴勞。嘉靖九年。給事中王希文言暹羅占城琉球瓜哇淳泥五國貢獻。竝道東莞。祖訓比對符驗。伴送舟有定額。來有常期。旋以夾帶行商多絕其貢。正德間。佛郎機混入流毒。屏絕曾

未踰數朞。遽議開復。損威已甚。疏下都察院覆請。今後諸國進貢。依期比對。驗放番貨如舊。萬曆中國王卒。無子。族衆爭立。相誅殺且盡。乃立女主爲王。今稱大泥。隸暹羅。嘗與回回錫蘭山國各附舶香山濠鏡灣貿易。貢物有寶珠梅花龍腦生玳瑁黑小廝倒掛鳥。產鶴頂吉貝西國米料藤。其國以版爲城。王所居。覆以貝多葉。坐繩牀。出則擁大布單。衆舁之名阮囊。地熱多風雨。有麻稻。無麥蠶絲。飲椰子酒。鳴鼓擊鉦爲樂。最敬華人。醉者輒扶以歸。婚聘先以酒。次檳榔。又次指環。或金錢成禮。以

十二月七日爲歲節。習戰鬥。鑄銅甲若火筒護腹背。國有藥樹。煎其根爲膏服之。及塗體。兵刃傷不死。葬用棺。以竹舉載。棄山中。二月始耕。祀之。如是七年不復祀矣。市率用金錢。以竹編貝葉貯食。

南巫里

南巫里小國。隸淳泥。自蘇門答刺丹行三晝夜。至龍涎嶼。獨峙南巫里洋中。東距黎伐。西北距海南。連大山。山南際海。僅千餘家。皆回回人。俗朴少穀。食魚蝦。市用銅錢。王居類樓。甚嚴潔。西北海洋中有帽山。平頂上。人稱爲那沒黎。番舶皆以此山爲

指南山下。淺水。有珊瑚。大者高二三尺。枝漣娑可。愛。依山居人數十家。皆稱阿孤渣。華言王也。永樂中入貢。產降真香。黑珊瑚。又南泥利國。其王馬哈麻沙。亦於永樂中遣使入貢。或云卽南巫里。

蘇羅

蘇羅國。在東南海中。近淳泥瑣里。其國分東西峒。凡三王。各不相屬。東王爲尊。西峒二王次之。永樂十五年。東王巴都葛。以答刺西王麻哈刺吒葛刺麻丁峒王。以都葛巴刺卜。竝率其屬三百餘人。奉金縷表來朝。貢珍珠玳瑁諸物。賜王冠服。蟒玉金

皇明世去錄 卷八十二 南蠻 三
帶鈔幣各給印誥。即所部封爲王。東王歸次德州卒。命葬以王禮。謚曰恭定。賜祭。

御製碑文樹墓道。留其妃妾。僉從十人守墓。令畢三年還國。

勅封其長子都麻舍爲東王。十九年遣使來貢。貢道繇廣東。俗鮮粒食。食魚蝦螺蛤。釀蔗酒。短髮纏皂纓。織竹布。煮海爲塩。貢物有竹布。梅花腦。米腦。華芙。冬膏。油。所至城頗據天險。疑峒王所都。聚落不滿千家。頃歲饑。屢擁兵攻之。不能下。其國有珠池。入夜望之。光浮水面。夷人時從鮫室探珠。滿袖。賈舶至彼。值歲多珠。得一二携歸。獲利數十倍。否則所償頓減。每返棹夷虞。我他適。輒留數人爲質。鄰近地名高藥。饒有玳瑁。

彭亨

彭亨國一名彭坑。直暹羅西。在東南海島中。石崖崎嶇。傍多平原。望之坦迤如寨。土沃候溫。宜稼穡。饒蔬果。而稀鳥獸。誅茅覆屋。木城廣可數里。粒食誦梵經。煮海爲塩。釀柳爲酒。上下親狎。恥爲盜。椎髻繫單裙。富家女子飾金圈四五于頂髮。俗尚怪刻。香木爲人。殺人血祭禱。以祈穰。益漸于夷風矣。

皇明世法錄 卷八十二
洪武十一年。其王麻哈刺惹答饒遣使奉金葉表
貢番奴及方物。

賜綵幣。永樂十二年復朝貢。貢物有金水罐。地產片
腦。諸香花錫。今附舶香山濠鏡灣貿易。或曰其國
鄰柔佛。柔佛之副王精悍健鬪。其子娶彭亨王女。
將婚。副王送子之彭亨王。張宴戚屬畢會。溟羅王
子者。彭亨王妹壻也。贅與彭亨。時與席起爲壽。手
指一巨珠。光耀異常。副王心欲之。王子固靳不予。
副王恚。歸而治兵攻彭亨。王與溟羅王子奔金山
會淳泥王。以妹爲王妃。率衆來援。副王焚掠其宮。

室去。彭亨王命長子攝國。隨妃往淳泥。久之歸而
次子驍弒父兄自立。有溟羅屬夷曰毛思賊。每掠
人口海上。賣彭亨克崑崙奴云。柔佛一名烏丁礁。
林王服帶雙刀。諸酋望見王。棄刀于地。和南序立。
字用菱葦。以刀刺之。歲首以四月。地不產穀。惟跣
喜兵。彭亨丁機宜之間。幾無寧日。

溟羅

溟羅國一名文萊。負山面海。爲東洋盡處。西洋所
自起。俗素食。念佛喜施。惡殺民食。猪肉論。或有東
西二王。永樂四年。各遣使朝貢。貢物珍珠玳瑁殼

六慈悲

焦布香蠟黑小厮。相傳其國王為閩人。隨中使鄭和往。因留鎮焉。王府旁有中國碑。夷人婚娶。請王金印。印背篆文作獸形。云是永樂間賜。然不載會典。或其王假以彈壓夷落。非頒自上方也。王祝髮。裹金繡巾。腰背雙劍。步行。其親屬稱邦奇。闌嚴重。亞於王。向有石城木城各一。以築岸閉潮。折石城於長腰嶼。今止存木城。先是佛郎機來侵。國人走山谷。流藥水出。佛郎機多為所毒。因奔呂宋。產車渠片腦。菘藤。或曰即古師子國。在西海中。延袤二千餘里。多產奇寶。四序暄和。稱樂土。宋淳化中。闍婁使者來言。其鄰國有婆羅門者。有異術。人相危害。能先知之。按宋史婆羅門。即天竺也。

可以趨吉
避凶

滿刺加

滿刺加。舊名五嶼。直占城極南。自舊港順風八晝夜至。或云自東莞放洋至峴岫。收龍牙門港。二日程。東南距海。西北皆山地。瘠鹵。羈屬暹羅。歲輸金四。千兩。向未稱國。永樂三年。其酋長拜里迷蘇刺。遣使奉金葉表。朝貢。願內附為屬郡。七年。中使鄭和齎

詔勅銀印。封為滿刺加國王。請定疆域。并封其國西

山俾暹羅無侵擾。

詔封為鎮國之山賜

御製碑文勒石。

上以尚書蹇義善書。手授金龍文箋。命書詔。偶遺一字。義奏敬畏之極。輒復有此。

上曰。此紙難得。姑註其旁。義曰。示信遠人。何借是。

上深然之。復授箋更書。九年。王率妻子及陪臣五百四十餘人。來貢。廣州驛聞。命中使海壽禮部郎中黃裳往勞。

上御奉天門宴王。

蹇公此奏知大體

賜玉帶龍衣金銀器皿供帳。妃及子姓僉從。各賚文綺。有差。遣使送歸國。復郊餞。十年。脩貢。十二年。王母來朝。厚賜之。宣德九年。嗣王西哩麻哈刺者復來朝貢。優禮異它夷。命工部治舟遣歸。正統十年。後貢使數至。道繇廣東。天順三年。王無答佛哪沙卒。嗣子請封。遣使冊為王。成化十年。給事中陳峻等封占城王槃羅茶悅。聞為安南所虜。抵靈山不敢入。遂以所齎挾假風汛至滿刺加國互市。誘其王入貢。十四年。復因其嗣王馬哈木沙請封。命給事中林榮。行人黃乾亨往冊還。抵洋嶼。遭風溺海。

皇明世流錄 卷八十三
茲各廕一子入監讀書。爾後遂罷封使。正德中。被佛郎機仇殺。其王蘇端媽未見逐。退休陂隄。兵去復國。嘉靖初。遣使貢方物。給賞如例。八年。廣東以擒勦佛郎機。并絕安南滿刺加諸番舶。兵部議廣東原設市舶司。應聽如舊許之。二十七年。巡視浙福都御史朱純。報海夷佛郎機行劫漳州界。大破之。走馬溪。尋以御史疏糾濫殺。命兵科都給事中杜汝楨往勘。奏前賊係滿刺加國番人。私招沿海無賴。往來販鬻。拒殺。與純奏異。純竟得罪死者。其俗淳朴。尚回回教。王白帛纏首。衣青花袍。躡皮屨。

乘轎。男女椎髻。短衫圍白布。膚黑漆。間有白者。唐人種也。候朝熱。暮寒。無他產。有山泉流爲溪。於溪中淘沙取錫。煎成塊。曰斗錫。民以淘錫網魚爲業。及織芭蕉簟。屋如樓閣。用木高低。層布聯榻。趺坐。王居餘以錫箔。婚喪大類瓜哇。物價視華五倍。山有黑虎。視虎差小。或變人形。白晝入市。龜龍高四尺。四足。身負鱗甲。露長牙。遇人嚙卽歿。旁海人畏之。貢物有金母鶴。頂白鹿。黑猿。鎖服花縵。黑小廝。番塩錫。今其國爲佛郎機所據。訛稱麻六甲。或云卽古哥羅富沙。往滿刺加。入龍牙門。蓋山門相對。

皇明世宗 卷八十二
若龍中通船南有涼傘礁俗以擄掠爲豪遇番舶
多擁小舟迎劫非順風罕有脫者

佛郎機

佛郎機在海西南近滿刺加向不通中國正德十
三年其酋弒立遣使三十人入貢請封至廣東守
臣以其國不列王會羈使以聞

詔給方物直遣歸使者留東筦劫行旅至掠食嬰孩
廣人苦之守臣勒水兵攻勦乃遁會滿刺加愬佛
郎機攻逐其王御史丘道隆何鰲相繼疏請驅絕
後諸番夷舶并之粵潯市漳州久之兵部議滿

刺加諸國通市不宜概絕請禁漳而收之于粵報
可嘉靖二年佛郎機人別都盧等擁衆千餘破巴
西國遂寇廣東新會縣守臣勦擒之生得別都盧
等四十餘人詔梟境上二十六年寇漳州私市浯
嶼海道副使柯喬禦之遁去四十四年有夷目啞
喏喇歸氏者浮海求貢初稱滿刺加國已復易辭
稱蒲麗都家兩廣鎮巡以聞禮部議南番無所
謂蒲麗都家或佛郎機所託也行鎮巡詳覈爲謝
絕相傳其國頗富饒多畜犀角象牙珠貝胡椒身
長七尺高鼻白皙鶯嘴猫眼鬚捲而髮近赤亦多

髡首雍鬚貴者戴冠賤者頂笠見尊長撤去之着衫袴垂至踵皮屨衣服用鎖袱西洋布瑣哈刺靴華潔俗信佛喜誦經每六日一禮佛先三日食魚為齋至禮拜日鷄豕牛羊不忌手持紅杖而行飲食不用匙筯富者食麪貧與奴僕食米婚娶論財責女奩貲數倍無媒妁詣佛前相配以僧為證謂之交印國有大故亦多與僧謀人死貯布囊以葬所畜半入僧室市僧互易搦指節示數累千金不立文字指天為約無敢負相會則交捫心誤捫首勃然忿爭或詈辱及子孫父祖家長輒以死鬪性

信義可嘉

船制絕佳造此以為海漕可也

克狡嗜利善大鏡中人立死嘉靖初廣東巡簡何儒嘗招降佛郎機人得其蜈蚣船并鏡法以功陞上元簿蜈蚣船底尖面平不畏風浪用板捍蔽矢石長十丈濶三尺有架櫓四十餘置鏡三十四約每舟撐駕三百人櫓多人眾雖無風可疾走鏡發彈落如雨所回無敵其鏡用銅鑄大者千餘斤因名曰佛郎機然唯夷人精用之中國不及也

呂宋

呂宋國在東洋中國甚小以產黃金故富厚人勤朴不喜爭訟交易不立契繫身衣衫袴足穿皮屨

近于暹敦

出入佩刀自衛。亦時禮佛誦經。洪武五年。同瑣里諸國貢方物。永樂三年。遣使朝貢。

賜文綺。命廣東布政司宴勞。萬曆四年。助討逋賊有功。來貢道福建。其地去漳近。故多賈泊。今附香山濠鏡灣貿易。而中國通倭者。率闖入呂宋。以爲常。初佛郎機從大西來。自稱于系蠟國。與呂宋互市。因上黃金爲王壽。求地如牛皮大蓋屋。王許之。佛郎機乃剪牛皮相續爲四圍。求地稱是。王重失信。竟予地。月徵稅。因築城營室。列銃置刀盾。久之。圍呂宋。殺其王。而地併於佛郎機矣。其國王遣酋來

鎮。數歲一易。華人販呂宋。既夥。留居澗內。各壓冬。寢至數萬。萬曆二十一年八月。酋郎雷氏。敝裏系勝。征美洛居。以華人潘和五等二百五十人從。夷偃臥船上。令華人日夜駕船。稍倦。輒箠殺之。潘和五等不勝荼苦。謀夜半入臥內刺酋。持其頭大呼。夷驚起。辟易。悉赴水死。和五等盡獲金寶兵器。駕其船回。失道走廣南。爲交酋所掠。竟被留。獨郭惟太等三十二人得歸。明年酋子郎雷。猫吝從朔霧。往代。遣僧來閩訴。時都御史許孚遠疏聞。因以禮遣僧。置惟太等于理。始夷故奴視華人。至是釁益

皇明世宗 卷八十二
結而中朝采金之使四出。妄言男子張疑。且詭稱
呂宋機易山多生金豆也。三十年詔閩遣海澄丞
王時和往勘。酋聞大駭。華人流寓者爲游說。結蓬
爲厰如公署。夷亦令僧散花道旁。迎使者。盛陳兵
衛。邀丞入。爲設食。問丞華言開山。山各有主。安得
開。且金豆生何樹。丞數目疑。疑無以應。夷大笑。欲
兵之。華人曲解釋。登舟。丞悸死。疑坐誅。傳首海外。
然夷益疑華人。且啓疆。決計殲諸流寓矣。明年遂
謬言將征他島。凡華人寸鐵厚鬻之。華人利其直。
無持寸鐵者。乃刺期攻華人。華人覺走屯菜園。八

月朔。夷攻殺無算。華人羣聚大崙山。饑甚。夷復擊
殺萬餘。橫屍枕籍。存者三百人耳。是月漳亦大水。
頃之夷悔禍。下令招撫。藉華人貨。移書閩當路。俾
戚屬往領。賈舶復稍稍去。三十三年。

詔遣商諭呂宋無生事端。其後留者復成聚云。或曰
呂宋相連。曰啞。啞。啞。在海畔。稍紆入山。曰沙瑤。其
俗椎髻。跣足。耳穿大孔。垂金鏈。衣錦綺。多剪服之。
祀奉佛。所至拜寺。以兩手和南。尤嚴男女之禁。有
與妻嘲笑。卽從以刃。盜無大小。論死。其人願抵家
別者。聽及期。妻子送詣。酋登高棚。自剖腹死。孕婦

夷俗禮法
尚爾森嚴

以水灌之所生子置水中。築版為城，覆茅為屋。又有班隘者，即蚊罩山。山頭火光不斷，亦名火山。奇險不可到。人多扁頭赤身，不受佛郎機部署。此皆呂宋鄰壤諸夷也。佛郎機未據呂宋時，先聚朔霧與其國人親好。其破呂宋，朔霧與有力焉。今以一

和蘭

紅夷自古不通中國。與佛郎機接壤時，駕大舶橫行爪哇大泥間。及聞佛郎機據呂宋，得互市香山灣。心慕之。萬曆二十九年，忽揚帆濠鏡，自稱和蘭

海防何可不嚴

國欲通貢，夷共拒之。乃走閩。閩人李錦久客大泥，與和蘭習，說其酋麻韋郎曰：若請市，無以易漳漳海外，故有澎湖嶼，可壘而守也。宋璫在閩，若第謹事之，計無不取。如携者，三十二年七月，遂詐為大泥國王書，移閩當事。及中貴人高察，而以巨艦尾至澎湖。時海上汛兵俱撤，夷伐木駕廠，如履無人之境。而李錦徐拏魚艇，附入漳。詭為所擄，脫歸。當事繫錦，及前所遣猾商潘秀，令諭夷還自贖。已併遣材官捧檄往，乃多賚酒幣，覲後償。海上奸氓又潛移華貨私與市。夷益生心觀望，而宋璫已羶

皇明世宗 卷八十三
夷賄許以三萬金爲壽。與尋盟會當事所遣往諭材官沈有容雅饒才畧。從容諭夷多中窾其酋麻帝郎頗心動。衆露刃相挾。沈厲聲折之。爲語塞。因僅以夷刀及玻璃等器遺璫求市。已而當事嚴禁兵民接濟。疏請聲勦。夷度坐困。竟以十月宵遁。勾引錦秀等諭如法旋奉

旨傳諭大泥國。移檄和蘭。無爲細人所誤。維時閩海幸復寧謐。而本夷從此習華境曲折。心不能無他覲。兼之海上利夷金錢。勾引實繁。有徒四十五年。吏從呂宋港口迎擊華商。爾後遂大入澎湖。據爲

三窟矣。其人深目碧瞳。長鼻赤髮。閩人因呼爲紅毛番。又稱爲紅夷云。舟長可三十丈。橫廣五六丈。樹五桅。凡三層。旁鑿小窓。置銅銃。以俟桅下。大銃長二丈餘。中虛如四尺車輪云。發此可洞石城。震數十里。非敵迫亦不輕施也。舵後銅盤大徑數尺。往來海道不迷。稱照海鏡。奉事天主甚謹。每役使烏鬼行巨濤中如平地。或云紅衣富金錢。遇華人貨當以輒厚償。不甚較直。海上貨爲紅夷售。則價驟涌。其來領國母錢巨萬。求開市。不習戰。已因中國驅逐。始募倭衝鋒。所恃獨銅銃。其舟旣大。亦不

便回旋可以計破。今紅夷鏡法盛傳中國。佛郎機又爲常技矣。

美洛居

美洛居國於東海中。稍稱蕃富。酋出盛威儀。所部合掌伏道旁。男子祝髮。女椎結腦後。多市中國酒器豪飲。席間設二大盆盛酒。人手一器飲之。長大者起爲夷舞。年少環視。遂不敢登場也。初佛郎機來攻。願歲輸丁香請降。遂赦使自爲守。紅夷旣鴟張海外。忽以舟師直搗城下。虜其酋。語曰。若改事吾。殊勝白頸。以佛郎機人頸皆白。故云。酋袖手聽。

夷人豪飲
如長應吸
百川

紅夷唯謹。佛郎機聞而急治兵。討違命者。會紅夷去國內空。因誅紅夷所立酋。更立素所親信。已而紅夷繼至。復逐之去。歲相攻殺。遞爲雄長。華人流寓者。羈有口。因爲游說。中分兩國相界處。一高山以山北屬和蘭。山南屬佛郎機。遂各罷兵。然自是其國苦兩屬。賈舶亦饒舌矣。所產多丁香。夷人用以辟邪。東洋及此地多有之。

蘇門答刺

蘇門答刺一云卽須文達那國。東南大山。西北距海龍涎嶼。西去一晝夜程。乃西洋要會。或曰漢條

皇明世法錄 卷八十三
支唐波斯大食卽其地也。自滿刺加西南行順風
五晝夜至答魯蠻村。舍舟陸行十餘里。至其國無
城郭。有大溪入海。海口濤惡。善溺舟。洪武中遣使
奉金葉表。貢馬及方物。永樂三年。其酋宰奴里阿
必丁遣使朝貢。

詔給印誥。封爲蘇門答刺國王。五年使來貢。頃之王
與花面王戰中。矢歿。子弱。其妻號于國曰能復讐
者。我。以。爲。夫。與。共。國。事。有。漁。翁。率。衆。殺。花。面。王。王
妻。遂。從。焉。亡。何。故。王。假。子。攻。殺。漁。翁。王。子。蘇。幹。刺
奔峭山。永樂十一年。中使鄭和擒假王送京伏法。

諸番震服。宣德中。貢使數至。用金葉表。十年。封其
子嗣王。成化二十二年。番商馬力麻許稱蘇門答
刺使臣。私販易廣東。右布政使陳選發其奸。抵罪。
是後間一朝貢。貢物有犀牛龍涎水晶石青回回
青。或曰今其王再易姓。大治宮室。凡六門。門不得
闌出入。王出乘象。鹵薄。傳呼甚盛。法嚴於他國。俗
頗淳。椎髻裸體。腰圍色布。剝獨木爲舟。漁海上。土
產類滿刺加。田瘠。穀少熟。胡椒蔓生。番舶往來。貨
克切。市用金錫錢。酋長好殺。輒取人血。俗釀茭樟
子爲酒。其國一名啞齊。有山連阿魯那。孤兒黎伐

三國花面王者。卽那孤兒王也。國小僅比大村。可千餘家。以墨刺面爲花獸狀。故名花面。風俗大類蘇門答刺。山產硫黃。

阿魯

阿魯國在西南海中。一名啞魯。自滿刺加順風三晝夜至。風俗氣候大同蘇門答刺。土瘠產薄。種芭蕉椰子爲食。男子裸體圍梢布。常駕獨木舟入海捕魚。或山行採米。腦香物。售商船。防身以藥鏃弩。永樂五年。其王速魯唐忽先遣使附古里諸國朝貢。令中使往賜王文綺。貢物象牙。熟腦。或曰淡洋。與阿魯山接。山圍繞有港。通大溪。千里奔流出海。味甘淡。舟人往來汲之。名淡洋。田肥禾盛。米粒小而香。東西竺歲仰食焉。

賓童龍

賓童龍國與占城接。按宋史爲賓同隴國。至道三年。嘗偕大食國使來朝。其國北接蘇門答刺。有雙澗水清徹。佛書所云舍衛乞食。卽其地也。目蓮居址尚存。風土大類占城。編茅覆屋。酋首出入乘象馬。親喪持孝服。擇僻地以葬。產伽南香象牙。

錫蘭山

中國宜傳此禾種

皇明世法錄 卷八十二
錫蘭山與柯枝國對峙。以別羅里爲界。自蘇門答刺順風十二晝夜。至占城極西。可望見焉。番語高山爲錫蘭。因名。或曰卽古狼牙須國。梁天監中。嘗奉表修貢。表稱大吉天子。足下。其國去廣州二萬四千里。在南海中。海中有翠藍山最高。循山東南。乘風三日。至赤卯塢。人穴居。裸形。網魚蝦。種芭蕉。椰子爲食。又西循海行十日。至佛堂山。泊舟。有大磐石。印足跡三尺許。水不涸。相傳先世釋迦佛。從翠藍嶼來。登躡跡尚存。山麓有臥佛寺。稱爲釋迦涅槃真身。佛榻華飾。有舍利子。又西北陸行五十

里。抵王居。王尚釋重象及牛。煨牛糞塗體。飲牛乳。不食其肉。有殺牛者罪歿。地廣人稠。宜稻。聚百物。富饒。亞瓜哇。山產水晶。青紅寶石。黃牙鵝石。每大雨。衝流沙中。拾取之。海旁有珠簾沙。光浮動。射日間。歲淘珠。諸番賈爭來市。市用金銀。國人去鬚。留髮。纏首穿長衫。圍單布。梁書稱狼牙王先奔天竺。俗袒而被髮。以吉貝爲干縵。王及貴臣。如雲霞布。覆脾。金繩爲絡。帶金環貫耳。女子被布瓔珞繞身。王出乘象。蓋近天竺教云。永樂九年。中使鄭和賚詔諭西洋諸國。歸經錫蘭山。其王亞烈苦奈兒負

皇明世法錄 卷八十二
固謀發兵絕歸塗。和先發銜枚襲擊。虜其王獻俘。闕下釋之。擇立其屬賢者。十年封耶巴乃那爲王。正統十年遣使貢珠寶石。天順三年復來貢。貢物有珊瑚硫黃乳香沒藥藤竭蛻石。

覽邦

覽邦國地多沙礫。麻麥外無他穀。山坦迤無峯巒。水亦淺濁。俗好佛喜賽祀。有駝馬牛羊。市亦用錢。洪武九年國王昔里馬哈刺札的刺札遣使奉表來貢。永樂宣德中附鄰境貢方物。有胡椒蘇木檀降香孔雀。或曰其國好食人。故覽邦港口船無維纜者。外有小嶼名奴沙牙。近嶼打水用丁午針六更望錫蘭山不遠。

柯枝

柯枝一名阿枝。古槃槃國。東連大山。西南北皆海。自錫蘭山西北舟行一晝夜。至通古里國界。永樂二年國王可亦里遣使朝貢。十年復至請封其國大山。

詔賜王印誥。并封山曰鎮國。

上親製碑文。其銘曰。截彼南山。作鎮海邦。吐烟出雲。爲下國洪龐。時其雨暘。肅其煩熯。作彼豐穰。祛彼

氛妖庇于斯民。靡災靡沴。室家胥慶。優游卒歲。山之塹兮。海之深矣。勒之銘詩。相爲終始。會中使鄭和使至。其國王首纏黃白布。下縈絲帨。束綵壓腰。瑣里人也。國人椎髻短衫。圍以單布。族有五種。南毘最貴。祝髮線懸脛。與王同類。次回回人。次富有財曰哲地。次牙僧曰革全。其最卑賤曰木瓜。木瓜居瀕海業漁樵。屋簷不得過三尺。衣不蔽膝。或裸體遮以艸。遇南毘哲地蒲伏。俟其過乃起。王尚浮屠。範金爲佛。每旦鳴鐘鼓。汲泉灌佛頂。數四乃禮之。兼敬象牛。有曰濁肌者。胎髮縷縷垂後。塗體以牛糞。灰行吹大螺。妻隨之乞錢。蓋優溲夷云。氣候常暖多雨。土瘠俗淳。產胡椒貯以倉。轉售商販。市用小金錢名吧喃。銀錢十五當金錢一。

小葛蘭

小葛蘭國。其東大山連赤土。與柯枝國接境。西南北皆海。自錫蘭山別那里。西北海行六晝夜至。候熱土瘠。仰俯葛刺國。米爲食。風俗小淳。多回回喃毘人。尚浮屠。重牛象。飯和酥酪。婚喪巾服。大類錫蘭山。地產胡椒。市用金錢。大者名儻伽。重八分。小者名吧喃。小錢四十。准大錢一。永樂五年。附蘇門

答刺等國朝貢。貢物珍珠青白綿布胡椒。尋中使鄭和至。其國王瑣里人。復遣使入貢。又有大葛蘭國。與都欄樵相近。土黑墳宜穀麥。居民懶事耕作。歲賴鳥麥之米爲食。

木骨都束

木骨都束國瀕海。自小葛蘭順風二十晝夜至。地曠田瘠。或數年無雨。穿井極深。絞車以羊皮袋水。俗囂習射。富者附舶遠賈。貧民網海魚爲食。男子拳髮四垂。腰圍梢布。女人髮盤於腦。黃漆光頂。耳掛絡索。項帶銀圈。纓絡隨胸。出則單布兜遮。青紗蔽面。足履皮鞋。永樂中嘗朝貢。產乳香龍涎金錢豹。

卜刺哇

卜刺哇國與木骨都束國接。自錫蘭山別羅南去二十一晝夜至。居傍海壘石爲城。業漁無田耕藝。稀艸木瓜茹。廣斥鹵有塩池。但投樹枝。良久撈起。凝白塩其上。拳髮穿短衫。圍梢布。婦女耳帶金錢。項掛瓔珞。產馬哈獸。狀如麝獐。花福祿狀如花驢。永樂中嘗遣使朝貢。

古里

古里縮西洋諸番之會。西瀕海南距柯枝。自柯枝海行可三日。至或曰從錫蘭山取道順風十晝夜至。亦海中一大國也。去中國十萬里。土瘠然宜麥。穀俗龐厚。以石灰畫地為禁。傍海為市。通諸番貨。用金銀錢。好馬自西番來。匹價金錢千百。胡椒多貯倉廩。以待商販。男子長衫。手纏白布。婦女短衫。圍色布。兩耳懸金牌。絡索項掛纓絡。臂腕足脛。用金銀鐲。以葫蘆為樂器。紅銅絲為絃。歌聲相協。鏗鏘可聽。王好浮屠。敬象牛。老不傳子。傳外孫。否則傳弟。無外孫弟。傳善行人。永樂三年。其酋沙米的

音律一新

遣使朝貢。

勅封為古里國王。給印誥。五年七年並朝貢。貢物有琉璃瓶。椀珊瑚珠。拂郎雙刃刀。番花人馬象物。手中。嘗貢金絲寶帶。金絲細如髮。結花綴八寶珍珠。鴉鵲石於上。鄰有坎夷巴國。出捨黎布。五色悅。皆濶四五尺。鬻於古里。又古里班卒國在海中。永樂三年。遣使來朝貢。俗質朴。男女被短髮。假錦纏頭。紅紬布繫身。土瘠少穀。氣候不齊。夏多雨。雨即寒。產甚薄。

忽魯謨斯


人亦巧

皇明世法錄 卷八十三
忽魯謨斯在西南海中。東連大山。自古里國十晝
夜至。土沃民饒。廣麥少穀。壘石爲城。屋山五色。皆
塩。鑿爲槃。磔因食焉。男子偉貌。拳髮。穿長衫。善騎
射。女子編髮四垂。漆頂。出則布幔兜頭。用青紅紗
布蔽面。兩耳輪掛絡索金錢數枚。以青石磨水點
眼眶唇臉。花紋爲美飾。市用金銀錢。產珍珠寶石
金珀龍涎香。撒哈刺。絨毯。或曰產大馬。西洋布。駝
雞。福祿靈羊。喜作佛事。歌舞。俗頗淳直。永樂三年
遣使來朝。貢方物及駝雞。

上命侍臣金幼孜爲之賦。駝雞如鶴。長三四尺。脚二
指。毛如駝。行亦如之。其國又云忽魯母恩。或曰忽
魯母恩。國小。土瘠。產薄。在東南海中。皆莫攷。

祖法兒

祖法兒國。又名左法兒。自古里西北海。行十晝夜
可至。東南皆海。西北重山。壘石爲城。屋高三四層。
亦石砌。狀如塔。田廣而饒。土黃赤。不生艸木。民漁
海爲生。氣候常如秋。俗頗淳。尚回回教。王白布纏
首。衣青花絲帨。或金錦袍靴。屨乘輪跨馬。前後列
象駝。吹篳篥。女人出。以布蒙頭面。市用金銅錢。文
如人形。永樂中。王亞里遣人來朝。貢。宣德中。復至。



皇明世宗 卷八十二
產西馬鶴頂駝雞福鹿片腦沉香乳香乳香卽樹
脂以易中國磁器紵絲駝單峯雙峯皆可乘或曰
其國無城郭產金錢豹

阿丹

阿丹國近古里瀕海可舟行或曰自古里國順風
二十晝夜至土沃豐粟麥壘石爲城有馬步勝兵
數千倍拳髮穿長衫婦女出不露形用青紗蔽面
布帽兜頭兩耳垂金錢數枚項掛瓔珞產千里橐
駝黑色花驢羚羊自胸至尾垂九塊名九尾羊永
樂九年遣中使鄭和往

賜命互市古南荒有丹丹國疑卽此或曰其國善推
算歲無閏月市易有赤金紅銅諸錢嘉靖時迨方
丘及朝日壇玉爵購紅黃玉於天方哈密諸夷不
得通事撒文秀言二玉產在阿丹去土魯番西南
二千里其地兩山對峙自爲雌雄或時自鳴請依
宣德下番例賚重賄仙賄
上竟從部議已之又阿哇國永樂中王昌吉利嘗
遣使朝貢

古麻刺

古麻刺國在東南海中永樂十八年國王幹刺義

皇明世宗 卷八十二
亦敦奔率妻子及陪臣來朝。貢方物。請封給印誥。令仍舊號。次福州卒。

賜謚康靖。勅葬閩縣。有司歲時祭焉。或曰。麻刺國有州百餘。佛宇至四千區。向未通中華。其南有層坡國。在大海中。西接大山。其人大食種。纏青布。躡皮鞋。地多巖谷。少寒。產象牙生金。

西洋瑣里

西洋瑣里國瀕海。近瑣里。眎為差大。洪武三年。其王別里提奉金葉表貢方物。賚予甚厚。永樂元年。復遣使朝貢。

上諭海外遠夷附載番貨其勿征。二十一年。西洋十六國遣使千二百人貢方物。西洋瑣里貢物獨著其貢有黃黑虎毳羅錦被。

瑣里

瑣里。西海中。小國。洪武五年。其王卜納的遣使奉金葉表貢方物。并圖上其土地山川。

賜大統曆金幣。永樂元年。復遣使朝貢。貢物有紅撒哈刺諸異布。

淡巴

淡巴國。在西南海中。或曰即古狼牙脩國非也。洪

皇明世宗 卷八十二 南洋蠻 七 瑣里 淡巴 甘巴里

外風氣
滅中華

武十年國王佛喝思囉遣使奉表朝貢。賜金幣。其國土廣景秀泉甘水清饒艸木孳畜石城瓦屋市肆基置輿馬威儀甚都國人勤治生稀寇盜耕維各有常業居然樂土貢物苾布毳羅綿被沉速諸香胡椒。

甘巴里

甘巴里又名甘把里國在南海中大島上人多織錦粒食亦鮮食永樂十二年國王兜哇刺查遣使朝貢或曰甘巴里小國介西南海中不通鄰境交易產薄用窘然奉佛亦不求積聚。

討來思

討來思在海中周徑不百里城近山山下有水赤色望之如火俗尚佛主家事以婦人市多駝羊馬牛亦有布縷毛褐交易用錢土宜麥稌無稻穀宣德六年朝貢。

勿斯里

勿斯里國所轄州一十六村落三百六十每村供國賦一日王白晢纏首着衫出入乘馬儀從甚都道不三百匹金鞍寶轡虎十頭縻以鍊索臂鷹挾劍以從多至千百人有大塔高二百丈國被兵則

德公之說

皇明世宗金 卷八十二
據塔拒敵。可容二萬衆。蓋亦勁國云。或云其國百
年不一雨。有天江水極甘。每溢可浸田水。過而耕
莫知其源也。江上有鏡。它國盜兵來。輒先照之。

木蘭皮

木蘭皮國在西海中。自大食國舟行正西。涉海百
餘日方至。一舟容萬人。中有酒肆機杼。舟之大無
過木蘭者。物產亦異。粒長三寸。瓜圓六尺。香櫟桃
榴竝巨。胡羊高數尺。尾大如扇。春割腹取脂。縫合
仍活。秋風忽起。人獸急就水飲。稍遲渴死。

打回

打回海外小國。永樂三年遣使朝貢。其國數苦隣
境侵逼。已乃治兵與戰。獲勝稍得自立。

咭哈

咭哈小國居海島中。白布纏首。身穿小袖長衫。食
以手。忌豕肉。見華人食。輒厭其穢。與順哈並不通
朝貢。附舶香山濠鏡。貿易產胡椒蘇木。荳蔻象
牙。

順哈

順哈亦海島小國也。人醜而黑。衣布帛。飲食生熟
相半。婚姻不論貴賤。意合則從。產胡椒象牙丁香。

皇明世宗金 卷八十二 三
善處之。可因以爲間。雖籬籬失而耳目在。計非全拙。乃市賞無藝。至爲東西虜攘臂掛藉。譬養鷹而絛繼去手。又如之何。余攷兀良哈事。至霧靈山不果城。更以媒譖。未嘗不歎邊臣之難爲任也。

兀良哈

兀良哈本東胡遺種。其地西連開平。在烏龍江南。漁陽塞北。春秋時屬山戎。秦爲遼西郡北境。漢初匈奴冒頓滅東胡。走保烏桓山。至武帝因徙烏桓於上谷。漁陽左北平。遼東五郡塞外。伺察匈奴。置護烏桓較尉監領之。而東胡支姓別依鮮卑。亦因

以爲號。曹操北征烏桓。繇盧龍越白檀。涉鮮卑庭。俘降者十餘萬。後東部鮮卑宇文別族破於慕容。晁竄匿松漠間。元魏時復居鮮卑故地。號庫莫奚。歲致名馬文皮。俗同突厥。好寇劫。至隋去庫莫奚。奚唐貞觀中奚長可度內附。置饒樂都督府。尋叛服不常。安祿山節度范陽盛飾俘詭邊功。咸通後契丹方強。奚舉部役屬其酋。去諸以數千帳。保媯州北山。自別爲西夷。而東奚駐琵琶州。及石晉割幽州雁門以北入契丹。東西奚遂併隸焉。遼城故奚王牙帳地。實以漢戶號中京大定府。金因之。元

初為北京路總管府。至元中改太寧路。國初割錦義建利諸州。隸遼東。置都司於古惠州。領營興等衛所二十餘。所謂北平行都司也。洪武十四年。封子權於大寧為寧王。時宋國公馮勝征納哈出。上諭據大寧塞。列戍控制。遂築大寧寬河會州富峪四城。每出師留重兵居守。卒破降納哈出。二十年設行都司。明年故元宗室遼王阿札失里及朶顏諸酋願內附。二十二年。詔於潢水北兀良哈地分三衛居之。自錦義度遼河

至白雲山曰太寧衛。以阿札失里為指揮使。塔賓帖木兒為同知。自黃泥窪踰瀋陽鐵嶺至開原曰福餘衛。以海撒男答為指揮同知。自廣寧前屯歷喜峰近宣府曰朶顏衛。以脫魯忽察兒為指揮同知。並給印。俾鈴束部落為東北外藩。靖難兵起。從劉家口襲大寧。盡拔諸軍。名兀良哈諸酋長以三衛胡騎挾寧王入松亭關事平。

詔三衛奉職偵虜。如

高皇帝時官。其酋為都督都指揮。餘以次授秩。

賜勅陞襲。令歲再貢駝馬。繇喜峰口驗勅入衛無過

百人。會徙寧王南昌。改北平行都司爲大寧都司。移保定大寧地。虛三衛。因頗竊據。出沒塞下。永樂三年。福餘衛請鬻馬。令於廣寧開原互市。九年。以三衛爲本雅失里所脅。掠我邊卒。又遣苦列兒等。給云。市馬行窺伺。命指揮木答哈等諭還所掠。仍納馬三千匹贖罪。比馬至。償以布。又許以馬易糧。上馬至十五石。絹三疋。後以邊困。議裁馬直。得布絹半給。而三衛名暱。就中國。且陰導虜。二十年。上北征阿魯台。旋師。夜召諸將諭曰。虜敢爲悖逆。以兀良哈羽翼也。當分兵

剪之。遂簡步騎五萬。分五道往。而身率大軍邀其西。師次屈裂兒河。虜數萬驅牛馬西奔。陷澤中。麾騎兵前擊。斬級數百。虜自相蹂藉。死無算。上垂高瞭。虜復聚。遂張左右翼。嚴陣夾攻。令夾士持神機弩。伏深林。戒寇至乃發。頃虜突而左。左師馳之。走林中。中伏驚潰。死傷畧盡。追奔三十餘里。蕩其巢。還以勦兀良哈捷頒。

詔天下。自是三衛稍劄。自戢。宣德元年。朵顏衛指揮哈刺哈孫等朝貢不至。武進伯朱榮鎮遼東。請掩擊之。勅榮整兵慎防。無與深較。三年秋。

上親歷諸關駐蹕石門驛。守將奏兀良哈萬眾盜邊已入大寧。經會州將及寬河。諸將請益徵兵。上曰。孽虜無能爲也。朕以鐵騎三千。出其不意。成擒必矣。遂決策親征。簡士三千人。人二騎。持十日糧。夜銜枚出喜峰口。馳四十里。昧爽至寬河。距虜營二十里。虜望見以爲乘障。卒悉眾前。

上麾鐵騎分兩翼進。親射其前鋒。殪三人。飛矢雨集。神機銃叠發。虜潰走。睹黃龍旗。大驚。羅拜請降。並生縛之。斬其酋。命諸將窮搜虜穴。忠勇王金忠以故韃靼名王子。及其甥都督把台請自效。或密言

上虜其類也。往必不反。

上竟遣之。忠與把台果大獲來歸。

上飲以金爵。遂輟賜。顧謂侍臣。王者宜推誠待人。漢用金日磾。庸不足法耶。初

高皇帝克元上都。設開平衛戍守。東接大寧。古北口。西接獨石。各置驛四。自大寧旣棄。開平勢孤。五年。城獨石并徙開平衛。凡棄地三百里。自是盡失。龍岡灤河之險。邊陲斗絕。益騷然矣。六年

詔蠲三衛罪。予自新。以泰寧衛印奪于虜。明年更給。是歲阿魯台敗。兀良哈遂住牧遼東塞。九年。瓦剌

脫權攻殺阿魯台。併諸部勢寢強。因通兀良哈正統元年。福餘失印。更給如泰寧例。而脫權遣使貢通兀良哈及女直潛伺。屢諭不悛。三年春。其酋阿魯歹等。以五百騎掠葭州。獨石守將楊洪遮擊西涼亭。生擒百戶乞麻旦等。奪所掠。命集兀良哈使臣。僂之市。因諭都指揮安出等。縛首惡獻。明年夏。三衛酋及都等。懇賞薄互市失利。非文皇帝故事。因陛辭。勅諭之。其秋。楊洪復破其騎五百于白塔兒。

璽書褒賞。五年。貢使易農具歸。見阻關吏爲言。

上聽給予。明年。福餘部脫火赤完哈等。佯射獵掠邊。被獲。明年。復掠遼東。守將曹義擒其酋孛台並磔之。是時。以都御史王翱督遼東軍務。自山海抵開原。斥堠相望。謹備虜及三衛。八年。兀良哈諸部侵東北關。索鹽米。始於喜峰。密雲。設都督及都指揮。鎮守驗貢。然多不過百餘騎。九年。以三衛聚犯。詔發兵二十萬。分四道。成國公朱勇出喜峯口。左都督馬諒出界嶺口。興安伯徐亨出劉家口。左都督陳懷出古北口。踰灤江。渡柳河。徑大小興州。過神樹。破福餘於全寧。復破泰寧。桑顏於虎頭。出鹵獲。

萬計。而都督同知楊洪出黑山。俘斬安出部。各論功加秩。三衛從是寢衰。然怨我遂刻骨。因糾脫權子也。先入寇爲之鄉導矣。十二年春。都御史王翱同總兵曹義巡塞外。抵廣寧。兀良哈伏林中。義擊敗之。十四年三月。福餘泰寧共潛結也。先入寇。朶顏獨扼險不從也。先至不能入。大掠二衛人畜去。其秋旋與虜合。土木北狩。命都御史鄒來學經畧京東。并設叅將總兵。罷朶顏三衛互市。景泰二年。復議予貢。當關驗放。伴入。然三衛常竄名北虜使。中窺我。遇北使厚。不無心望。且結婚迤北。挾爲重。

稍用侵軼。盡沒遼河東西三岔河北故地。薊遼多事。自此始也。四年。兵部尚書于謙言三衛使疊至。頗爲虜間。宜今邊臣嚴備。因條上防禦諸事。

詔是後使至。伴二三人入京。餘不得輒入關。五年。泰寧衛都督僉事革干帖木兒。乞大寧廢城及甲盾。尚書謙持不可。

帝重絕三衛權。遣譯者語大寧城逼近塞。不便馳獵。又炎暑多生疫。其甲盾須寇至乃給。六年。及朶顏諸酋朝。乞耕地及犁鏵種糧。

詔予糧三十石。亡何入邊。叅政葉盛督師郤之。天順

皇明世宗憲皇帝 卷八十三
三年。虜酋李來謀掠三衛。諭革干帖木兒申徹進
左都督。明年歿。以其子脫脫孛羅襲父都督僉事。
時三衛多與李來通。貢使浮額。自景泰末業從獨
石萬全右衛闌入。至是隨李來使者走雲中。成化
元年。李來爲請賞。

勅諭四方貢使。賞有成額。三衛曩朝貢從東路喜峰
口。今朶顏都督朶羅干等擅易貢道。希混賞。

朝廷照例分別。又何誅焉。是歲寇邊。遣都督李鐸往
諭至泰寧。遣兵部以奉使無狀。請逮治。

詔貸之。泰寧衛酋請市牛及農具塞下。并乞賜蟒。

上諭蟒衣勿與他。聽與民交易。朶顏三衛各酋因請
職事。兵部覆未有成勞。例無陞授。不許。二年。迤比
瓦刺遣使貢馬。挾三衛從喜峰口入。

詔待以三衛禮。勅其酋阿失帖木兒無糾朶顏。安更
貢道。三年。海西女直偵報北虜毛里孩通朶顏。三
衛聲搶遼東。勅遼薊宣大守臣嚴備。四年。及毛里
孩侵天城。遣都督李譯誥之。五年。諭三衛常貢外。
無進海東青兔鶻。十二年。勾虜亂。加思蘭謀寇。十
四年。三衛酋乘巨璫汪直。與兵部侍郎馬文升爭
女直異同。請開市。二十年。三衛酋復請改貢道。從

開原兵部援例議格。先是自天順後虜酋潛結三衛蹂躪中朝。因羈縻不絕誘致之。亦不敢大為寇。弘治二年。兵部尚書馬文升奏往歲三衛盜虜馬經大同宣府報虜老營。今兩鎮經年不報。疑彼此相通。乞於團營選馬步三千赴永平。再三千赴密雲防禦。及會兩鎮巡操。三年秋喜峰口出哨軍士撲殺夷人。十年燒荒出塞掩殺。邊釁遂啓。十一年冬。朶顏入寇。兵部尚書馬文升議檄守臣分據要害。相機勦殺。其貢夷令通事傳語利害歸於酋長約束。仍請

勅三道切責三衛酋長。並從之。十七年。朶顏勾小王子入寇。

上御煖閣。

召大學士劉健等議遏虜。大學士李東陽言虜與朶

顏通潮河川古北口距

京師一日而近。宜固根本。無遠出師。自疲。

上深然之。時朶顏部落益蕃。屢侵盜。而諸部獨花當以完者帖木兒裔種最貴。花當次子把兒孫驍勇。敢深入。兼結婚小王子。為中國患滋甚。正德四年。泰寧衛酋滿蠻率部落二萬餘。欲附居近塞。避北

成石書

皇明世宗 卷八十二
虜令居故鎮安堡。戒無旁嚙。其後花當部屢挾增
貢。

詔暫增一年。不爲額。花當部堅請不從。乃益勾小王
子部虜。十年。把兒孫自鮎魚關毀垣入馬蘭谷。殺
叅將陳乾等。命都督桂勇征之。把兒孫遣扯禿等
來請入貢。且獻馬贖殺乾罪。兵部尚書王瓊持議。
必以把兒孫償乾。乃罷兵。予貢。把兒孫輒謾言呼
扯禿等去。我亦幸無事。竟予把兒孫貢班師。亡何
復入寇。叅將魏祥全軍歿。終正德世不能聲討。嘉
靖初。都督馬永帥薊有威信。三衛頗親。且畏不敢

深犯。始後當長子革列孛羅早歿。其次把兒孫兇
狡謀奪嫡。以種人不附。不得嗣。花當爲都督。至是
把兒孫歿。革列孛羅子革蘭台貢馬請嗣。兵部令
轉譯部落方許貢。革蘭台乃寇漁陽。諸小關堡率
殘破。十一年。巡撫都御史王大用欲厚多朶顏城
其霧靈山。不果。會酋阿堆哈利赤頻入建昌喜峰
太平諸塞。恣殺掠。革蘭台又請陞秩。兵部以御史
連疏詆大用。請以毛伯溫代。大用旣去。虜益盜邊
邊人皆廢耕牧。而朶顏諸部日益橫。十八年。花當
他子打哈脅求職事。聲阻貢。薊鎮請徵遼兵會剿。

上令姑申諭之。二十年。革蘭台挾北虜求添貢。衛三百人。不許。請二百人。亦不許。時剽掠塞下。聲結小王子。旦晚入寇。會俺答吉囊。自雲中深入太原邊。臣恐謬曰。頃山海關諸邊無敵。亦朶顏諸酋功也。詔補前貢失期者。衛二百人。明年。復導虜犯青山口。內批。以侍郎胡守中兼憲職。勦撫守中。儉險嗜利。多乾沒內帑金。又擅出塞。盡伐遼金以來松木百萬。自撤籬籬。且偏索富人。及舊弃金錢。言官論歛西市。巡撫徐嵩以阿附守中削籍。尋坐贓謫戍。明年。薊鎮出塞。襲朶顏別部李家莊。斬四十級。李家

莊零夷。居近獨石。不通大虜。慣盜馬。狡而善射。虜追輒走險。亦頗爲我扞邊。是役藉怨。轉與虜合。而遼東塞亦以朶顏故。連中虜。二十六年。兀良哈益結海西建州夷。出沒遼東西塞。明年。革蘭台死。子影克襲故事。三衛以貢時身受職。至革蘭台父子始遣人代請。而影克剽悍踰于父。益誘俺答大入塞。二十九年。遂導虜逼都城。方虜急。數言遼陽軍。遼陽軍者。虜所呼朶顏也。自庚戌後。始設薊遼總督。調邊兵入衛。及移戍薊。無寧歲。咸寧侯仇鸞旣拜大將軍。主開馬市。誘俺答執送叛人蕭芹等受

欵。調知三衛虛弱。朶顏酋影克實首禍。欲發兵出擒以爲功。兵部尚書趙錦及總督薊遼侍郎何棟持不可。三十年冬。棟計擒叛酋哈舟兒陳通事。舟兒通事皆邊民。降朶顏夷工爲虜謀。至是就擒伏法。傳首邊塞。三十二年。朶顏寇桃林關。總督侍郎楊博復構得首惡通漢。請繫獄。俟諸夷入貢。械赴喜峰口。宣示國威。諸夷並竦。三十六年。虜酋打來孫始收三衛導犯令口。三十八年。虜酋把都兒辛愛挾朶顏酋影克勒數萬騎薄塞。盡殺偵諜。度灤水繇潘家口入。大掠薊。總督侍郎王忬遣總兵馬

芳等以輕兵八千出虜後牽制。虜不敢深入。三日引出。

任大車者
貴有遠識
楊公已得
其窳

詔逮繫總兵歐陽安等并忬論死。移總督宣大尚書楊博代博以朶顏等夷通虜不爲用。乃申約舉燧。自居庸抵山海千里聯絡。虜聞震疊。終歲不敢近塞。明年影克復勾把都兒辛愛等犯一片石。叅將佟登等禦卻之。四十二年。虜數萬騎破墻子嶺。進掠通州。

詔宣大總兵馬芳等馳援。總督侍郎楊選逮繫棄市。其冬三衛入貢。禮部尚書李春芳請宣示諸夷。哨

報以時有反覆。即閉關誅勦。詔所司豐廩賚稱。

朝廷柔遠意。隆慶元年。朶顏酋董忽力。勾土蠻數萬騎。大入界嶺口。勢甚熾。以援師四集。走捧捶崖。迷路。墜崖枕藉。董忽力亦革蘭台子也。為影克親弟。是時影克出義院口。為我師火鎗擊死。而子長昂與忽力頡頏。明年。

上念山陵急薊。以譚綸為總督。拜戚繼光為大將軍。專理練兵。浚陞增陴。會俺答諸虜各奉款。迄隆慶三衛修職謹。邊鄙稍息。而長昂得襲職為都督。一

名專難為西虜青把都塔。萬曆元年。董忽力索賞喜峰口。啓釁。總兵戚繼光勒兵青山圍勦。忽力以身免。明年。縛首惡獻于款。始改喜峰口守備為叅將。彈壓之。而長昂與叔長禿擾寧前工。三年春。總兵戚繼光追逐昂。墜馬幾獲。得躍上。幾騎去。生縛長禿。羈董家口。昂納馬鑽刀盟。已復合。董忽力縱掠。四年。朶顏它部酋炒蠻。乘夜入我鴉鵲安。叅將苑宗儒等歿之。六年。昂勒賞阻諸夷進馬。遣弟璘。金率精騎窺喜峰。西掠前屯。薄山海一片石。九年。西虜璘古及馳昂營謀。大入遼。十一年。導虜以三

萬騎長驅中後所。直馳山海關。是時三衛屬夷八十餘種。而昂與董忽力大騃只馬答哈沙蠻小阿卜戶兵力最盛。號爲六克。然部落不踰萬。十二年。長禿董忽力犯前屯錦義。總兵李成梁追奔興中。迤西多斬獲。其秋長昂亦大入劉家口。且糾西虜哈不慎等數萬餘騎。以打牲爲名。圖盜邊會。

上視山陵。昂往來虹螺山射獵。調部夷東西馳。甚恣也。而忽力以犯遼。罷賞頗窘。十三年。率枝屬三百餘。叩關鑽刀。長昂以遼鎮聲搗穴。一夜數徙帳。亦哀請款。及已得撫。則愈驕。十七年。再入花場谷。十

八年。昂遣弟猱兔撥計來調盟石門。遊擊陳愚聞。給執通事張五烈等。僇之。其冬。昂同弟璘金犯董家口。二十二年。我哨騎生得伏謀郎打兒罕等七人。郎打兒罕係昂心膂。昂願革二年舊賞。請贖。


上幸許昂。自是亦稍戢。二十四年。福餘酋伯牙兒挾賞羅文谷。拒却之。明年。以千餘騎突青山口。及連犯扒頭崖三道嶺。竝失利。二十九年。叩關軟盟。長昂亦以是歲聽復馬市。寧前。頃之。猱兔撥計修石門。郟掠車廠庄。總兵尤繼先出塞擊虜。紅艸溝擒斬八十有奇。昂與璘金代叩關。三十四年。撥計挾

皇明世宗 卷八十三
賞葦子谷。昂與蟒金指減貢夷表裏。亦勾西虜班
不來世等。謀聚兵侵薊。明年昂圍獵墮馬。子賴
暈。及踵昂轍。同蟒金糾阿鎮等九夷。挾賞擦崖子
關三十六年。大入建昌。河流口。遼鎮總兵杜松。襲
拱兔部夷。來告捷。諸夷益鬪。因入大勝堡。總督侍
上郎王象乾。諭諸夷各聽撫。專勦賴蟒。賴蟒勢孤。乃
屬西虜啞拜台吉請款。四十年。蟒金等酋以千餘
騎縱掠曹庄。明年。滿旦雙只亦連。犯掛甲嶺麻郎
谷。四十三年。入窺厰房。烽延燒黃花邊外山場。四
十六年。奴兒哈赤躡撫順。滿旦及男溫布台吉等

乘隙睨石塘。而馬蘭亦報蟒金聲犯桃林界嶺。薊
鎮戒嚴。明年。石塘遊擊朱萬良調援遼。滿旦母子
益恣。以萬騎入攻白馬關。及高家堡。頃之。尋盟。而
它酋駱駝那莫賽。召里賓等。時時傳調聲挾。蓋隆
萬來三衛稱梟桀者。長董爲最。而長昂雄塞上垂
四十年。每勾西虜爲重。其後竄籍冒賞。衛系蹂雜
而土蠻部落。亦報箭入市。如虎墩炒花宰煖輩。並
詭三衛。加額濫觴。不可復詰。至滿旦以一夷婦。躑
躅曹石間。居然勁敵。尤可歎也。大抵三衛與韃靼
同俗。專逐水艸。喜偷剽。時入漠北盜馬。率三四人

驅千百匹。虜尾追不敵。則降事之為導。至納婚詛
誓。常營遼河兩岸。潛伺而貪中國賜予。亦時以虜
情輸我。得先時設防。向本仗為藩籬。及其叛。猶不
失為耳目。顧我善馭之如何。迫則鋌而走虜。耳目
塗塞。將為憂滋大耳。考三衛各分地住牧。率以廣
寧為界。福餘泰寧。頗鄰遼陽開原。而朶顏羶集寧
遠迤西境外。虹螺山。盡有舊大寧地。花當巢穴。直
古北口西北。葫蘆峪。故福餘泰寧。恒與東虜合。朶
顏恒與西虜合。衛制首泰寧。次福餘。次朶顏。而朶
顏于三衛地最險。偏虜及二衛益衰。朶顏獨強盛。

今遂用為首稱曰朶顏三衛云。




皇明世法錄卷之八十二 終

凡長哈

世法金

卷八十二

壹



古非

顏恒

顏今

